

आकाशवाणी

खबरां विजय बजाज कोला

1. प्रधानमंत्री नरेंद्र मोदी अज्ज ताशकंद च उज्बेकिस्तान दे राष्ट्रपति शफकत मिरजियोयेव हुंदे कन्नै दपक्खी गल्लबात करडन।
2. प्रधानमंत्री अज्ज दिनै 11 बजे अपने रेडियो कार्यक्रम मन की बात दे राहें देश-बदेश दे लोकें कन्नै बचार सांझे करडन।
3. नेपाल च चानचक्क हाड़ करी मरने आहलें दी गिनतरी बधिये 675 होई गई ऐ ते तकरीबन 2 जहार 400 लोक अजे लापता न। नेपाल सरकार नै भोते कोशी नदी च हाड़ दे खतरे गी दिक्खदे होई नमां अलर्ट जारी कीता ऐ।
4. बदेश मंत्रालय नै आखेआ ऐ जे नेपाल च अजे धोड़ी 108 भारतीएं गी सुरखित बचाया गेदा ऐ। 11 टन राहत सामग्री लेइयै भारत थमां चौथी डुआरी काठमांडु पुज्जी गई ऐ।
5. ते महिला क्रिकेट च भारत अज्ज दुबई अंतरराष्ट्री क्रिकेट स्टेडियम च थाईलैंड दे खलाफ मुकाबले कन्नै अपने टी-20 एशिया कप अभियान दी शुरूआत करग।

PM-Uzbekistan Prez.

प्रधानमंत्री नरेंद्र मोदी अज्ज ताशकंद च उज्बेस्तान दे राष्ट्रपति शफकत मिर्जियोयेफ हुंदे कन्नै दपक्खी गल्लबात करडन। दवै नेता राष्ट्रपति भवन च बपार ते निवेश, रक्षा, डिजिटल संपर्क, उर्जा, शिक्षा ते दौनें मुख्यें दे लोकें बश्कार संपर्क बदाने जनेह् मुद्दे पर सहयोग दी समीक्षा करडन। अज्ज प्रधानमंत्री होर अज्बेकिस्तान दे योगा फाउंडेशन आसेआ आयोजित कीते जाने आहले कार्यक्रमें च हिस्सा लैडन। मगरा ओह् सिद्दे उज्बेकिस्तान दे राष्ट्रपति हुंदे आवास पर जाडन जित्थे दवै नेता दपक्खी गल्लबात करडन। दौनें मुख्यें बश्कार पिछले 10 बरें च बपार 300 फीसद बदेआ ऐ ते एह् सब किश प्रधानमंत्री हुंदे जत्नें दी बदौलत होआ ऐ।

<><><><><><>

PM-Mann ki Baat

प्रधानमंत्री नरेन्द्र मोदी होर अज्ज दिने 11 बजे आकाशवाणी पर अपने “मन की बात” कार्यक्रम राए देश-विदेश दे लोकें कन्नै विचार सांझे करगंन। हर महीने दे खीरले ऐतवारें प्रसारत होने आहले इस कार्यक्रम दी एह 137मीं किशत होग। कार्यक्रम दा प्रसारण आकाशवाणी ते दूरदर्शन दे समूलचे नैटवर्क ए.आई.आर. न्यूज वेबसाईट ते न्यूज ऑन ए.आई.आर mobile app- सनें डी.डी न्यूज- प्रधानमंत्री हुंदे दफ्तर ते सूचना ते प्रसारण मंत्रालय दे यू-ट्यूब चैनलें पर बी

होगा। आकाशवाणी जम्मू आसेया हिंदी प्रसारण दे बाद एहदा डोगरी भाशा च अनुवाद प्रसारित कीता जाहग।

<><><><><><>

RSS

राश्ट्री स्वयंसेवक संघ दे प्रमुख मोहन भागवत होरें आखेआ ऐ जे मुसलमानें गी भारत दा हिस्सा नेई मनने दी सोच, हिंदुत्व दी भावना दे उलट ऐ। न्यूयार्क च इक दुनिया, इक मनुक्खता सम्मेलन गी संबोधित करदे होई श्री भागवत होरें आखेआ जे हिंदुत्व हर माहनुयै दे सम्मान ते धार्मिक बन-सबन्नता च विश्वास करदा ऐ। उनें आखेआ जे सब्बै माहनु इक बरोबर न ते सच्चाई तगर पुज्जने दे बक्ख-बक्ख रस्ते होई सकदे न। श्री भागवत होरें भारत दी सांझे अस्तित्व आली परम्परा दा जिक्र करदे होई आखेआ जे धार्मिक नेताएं गी समाज च एकता ते सदृभाव दा स्नेहा लगातार दिंदे रौहना लोड़चदा ऐ।

<><><><><><>

VP-Keralam

उपराश्ट्रपति सी.पी राधाकृष्णन अज्ज 2 दिनें दे अधिकारिक दौरै पर केरलम पुज्जडन। ओह् अलाप्पुझा च केरल कौमुदी दैनिक दे जयंती समारोह च शामिल होडन। एहदे मगरा ओह् पथाना मथिट्टा जिले च अरनमुला नौका द्रौड़ दा उद्घाटन करडन। संज्ञा ले उपराश्ट्रपति रिवंतपुरम च ओणम पर्यटन सप्ताह दे समापन समारोह दी परेड गी झंडी दस्सिए रवाना करडन।

<><><><><><>

Rajnath

रक्षा मंत्री राजनाथ सिंह अज्ज लखनऊ च आयोजित उद्योग सम्मेलन गी संबोधित करडन। एह् सम्मेलन उं'दे 3 दिनें दे दौरे दा त्रीया ते अखीरला दिन ऐ। पी.एम सेतू योजना दे तैहत आयोजित इस सम्मेलन च कौशल शिक्षा कन्ने सरबन्धत विशे पर चर्चा होग। कार्यक्रम शा पैहले राजनाथ होर प्रधानमंत्री नरेंद्र मोदी हुं'दे मन की बात कार्यक्रम गी सुनडन। एह्दे परेंत ओह् मुखमंत्री योगी आदित्यनाथ हुं'दी मजूदगी च लखनऊ छोड़ी खेतर च 101 करोड़ रुपें दी 12 विकास परियोजनाएं दा नीह पत्थर रक्खडन।

<><><><><><>

Telangana-CM EC

तेलंगाना दे मुखमंत्री रेवंत रेड्डी होरें निर्वाचन आयोग थमां मतदाता सूचिएं दी विशेष नजरसानी दरान ऐतराज ते शिकायतां दर्जे कराने दी समें सीमा बदाने दी मंग कीती ऐ। मुखमंत्री होरें मुख निर्वाचन आयुक्त ज्ञानेश कुमार होरें गी चिट्ठी लिखिए मौजूदा 16 सितंबर गी समें सीमा गी 4 हफ्ते बदाने दी मंग कीती ऐ।

<><><><><><>

Nepal Flood Toll

नेपाल च चानचक्क आए दे हाड़ च मरने आलेंदी गिनतरी बधियै 675 होई गेई ऐ जिसलै के उत्थे परतियै बरखा ते हाड़ दी शेंका दे मददेनजर तुपाई ते बचाऽ अभियान बरोबर जारी न। नेपाल च तकरीबन 2 जहार 400 लोक अजें बी लापता न जिंदे च घट्टोघट्ट 4 जहार 400 शा मते लोकें गी सुरक्षित बचाया गेआ ऐ। नेपाल पुलसै 8 जिलें थमां 675 शव बरामद होने दी तस्दीक कीती ऐ।

<><><><><><><>

Nepal Flood Alert

नेपाल सरकार नै भोते कोशी नदी च हाड़ दे खतरे गी दिखदे होई नमां अलर्ट जारी कीता ऐ। प्रशासन नै नदी दे कंडे रौहने आहले लोकें गी सतर्क रौहने दी अपील कीती ऐ। राश्ट्री आपदा जोखिम न्यूनीकरण ते प्रबंधन प्राधिकरण मूजब नदी च पानी दा रोड़ बदी गेआ ऐ। रसुवा जिला प्रशासन नै बी पानी दा स्तर बदने दी जानकारी दिंदे होई रसुवा, नुवाकोट ते धादिंग जिले च नदी दे आले दोआले रौहने आहले लोकें गी सौहगा सतर्क रौहने दी सलाह दिती ऐ।

<><><><><><><>

EAM-Nepal

बदेश मंत्रालय नै दस्सेआ ऐ जे नेपाल च जंदे बुधवारें चानचक्क आए दे हाड़ दे बाद हुनै धोड़ी 108 भारती नागरिकें गी सुरक्षित बाहर कड्डेआ गेआ ऐ। तकरीबन 50 ओकड़े भारतीयें कन्नै बी राबता परतियै कायम होई गेआ ऐ जिंदे

कन्नै पैहले संपर्क त्रुट्टी गेदा हा। बदेश मंत्रालय मूजब 275 भारती नागरिकें सने होरनें मुख्यें दी नागरिकता रक्खने आले भारती मूल दे 128 नागरिक बी अजें लापता नं पिछले 2 दिनें दरान 598 भारती नागरिक चीन थमां नेपाल पुज्जे न। तोआई, चीन च मजूद तकरीबन 900 भारती सुरक्षित न ते भारत दे राजदूती दफतरै उं' दे' नै राबता बनाई रक्खे दा ऐ। भारत सरकार, नेपाल ते चीन दे अधिकारिएं कन्नै मिलियै लगातार राहत ते बचाव कम्में च जुटी दी ऐ। विदेश मंत्री जयशंकर होरें दस्सेआ जे भारती वायु सेना दा सी-130 जे हरक्यूलिस जहाज कल 11 टन राहत सामग्री लेइयै काठमांडु पुज्जा।

<><><><><><><><>

Nepal India Teen

भारत थमां गेदे 11 सदस्यीय तकनीकी दल नै कल नेपाल च हाड़ें करी प्रभावित इलाकें च स्थित पनबिजली परियोजनाएं दी सुरंगें दा निरीक्षण कीता। डाक्टरें, चिकित्सा कर्मिएं ते सुरंग इंजीनियरें दा एह दल शुक्रवारें काठमांडू पुज्जा। कलओह नुवाकोट जिले दे त्रिशुली पुज्जे जित्थे उनें इक पनबिजली परियोजना दी सुरंग च फसे दे मजूरें गी बचाने दे जत्नें च सहायता कीती।

<><><><><><><><>

Women Cricket

भारत अज्ज महिला क्रिकेट च थाइलैंड दे खलाफ अपने टी-20 एशिया कप अभियान दी शुरुआत करग। भारती समें मूजब एह मैच रातीं साइडे 8 बजे

शुरू होग। हरमनप्रीत कौर भारत दी कप्तानी करडन जिसले कि स्मृति मंधाना
उप कप्तान होडन। भारत इस प्रतियोगिता दे इतिहास च सबनें थमां मती
कामयाब टीम ऐ जिनें 5 चा 3 मैच जिते दे न।

<><><><><><>

Weather

मौसम विभाग नै अज्ज ओडिशा च मौलेधार बरखा गी लेइयै रेड अलर्ट जारी
कीता ऐ। अरुणाचल प्रदेश, असम, मेघालय, छत्तीसगढ़ ते पच्छिम बंगाल दे
गंगा कन्ने लगदे इलाकें च बी तेज बरखा दी मेद ऐ। एहदे अलावा बिहार,
उत्तराखंड, मध्य प्रदेश, पूर्वी उत्तर प्रदेश, झारखंड ते पूर्वोत्तर दे किश राज्यें च
ऐसी गै स्थिति दा अनुमान ऐ।

<><><><><><>